



RVK-22742 Tilkynning um stjórnsýslukæru nr_ 164_2025_

Móttekið	27.10.2025 15:10:16
Búið til dags.	27.10.2025 15:17:22
Tilheyrir	 USK25100413 - Stjórnsýslukæra 164/2025 - Álfabakki 6 - Dagsektir vegna skiltis
Frá	Upplýsingar - Pósthólf Símaver (upplýsingar@reykjavik.is)
Til	skjalastyring@reykjavik.is

Innihald



uua@uua.is has just sent this issue

Reykjavík / RVK-22742

Beiðnin var stofnuð 27.10.2025
14:45

Tilkynning um stjórnsýslukæru nr. 164/2025.

Description:

Góðan dag.

Meðfylgjandi er afrit stjórnsýslukæru, móttekin 24. október 2025 ásamt fylgigögnum, þar sem kærð er ákvörðun skipulags- og byggingarfulltrúa Reykjavíkurborgar, dagsett 24. september 2025, um álagningu dagsekta að fjárhæð 150.000 krónur á dag frá og með 26. september 2025 fyrir hvern dag sem það dregst að slökkva á skilti og fjarlægja það af lóð nr. 6 við Álfabakka í Reykjavík.

Vegna framkominnar kröfu um frestun réttaráhrifa er farið fram á að úrskurðarnefndin fái í hendur gögn er málið varða, **þ. á m. fundargerðir, uppdrættir, umsóknir, samskipti við aðila máls og stofnanir**, fyrir 4. nóvember næstkomandi og er stjórnvaldi gefinn kostur á að tjá sig um kröfuna til sama tíma. Frestur til að skila umsögn í málinu er að öðru leyti **15 dagar frá dagsetningu þessarar tilkynningar**, en hægt er að óska eftir 15 daga viðbótarfresti, sbr. 5. mgr. 4. gr. laga nr. 130/2011 um úrskurðarnefnd umhverfis- og auðlindamála.

Varði hin kærða ákvörðun hagsmuni þriðja aðila er óskað upplýsinga, þ. á m. netfang og/eða símanúmer, um viðkomandi sem allra fyrst.

Óskast staðfest um móttöku.

Með kveðju,

f.h. nefndarinnar

**Ólöf
Harðardóttir,
skrifstof
umaður**

Úrskurðar

nefnd [https://eur01.safelinks.protection.outlook.com/?url=https%3A%2F%2Fwww.stjornarradid.is%2Fum-vefinn%2Fum-abyrgd-a-tolvuposti-og-email-disclaimer%2F&data=05%7C02%7Cupplýsingar%40reykjavik.is%7C038f4f4c38ba4e77d79708de1567221c%7C6aed0be3a6ff4c6c83b5bb72bdd10088%7C0%7C0%7C638971730804932621%7CUnknown%7CTWFPbGZsb3d8eyJFbXB0eU1hcGkiOnRydWUsIlYiOilwLjAuMDAwMCIslIAiOiJXaW4zMilslkFOljoiTWFpbCIsIldUljoyfQ%3D%3D%7C0%7C%7C%7C&sdata=rXVKzHs4M0m3v4nVosWLaV\(+354\) OZR%2BykvX1f1jfZ95tTCuY%3D&reserved=0](https://eur01.safelinks.protection.outlook.com/?url=https%3A%2F%2Fwww.stjornarradid.is%2Fum-vefinn%2Fum-abyrgd-a-tolvuposti-og-email-disclaimer%2F&data=05%7C02%7Cupplýsingar%40reykjavik.is%7C038f4f4c38ba4e77d79708de1567221c%7C6aed0be3a6ff4c6c83b5bb72bdd10088%7C0%7C0%7C638971730804932621%7CUnknown%7CTWFPbGZsb3d8eyJFbXB0eU1hcGkiOnRydWUsIlYiOilwLjAuMDAwMCIslIAiOiJXaW4zMilslkFOljoiTWFpbCIsIldUljoyfQ%3D%3D%7C0%7C%7C%7C&sdata=rXVKzHs4M0m3v4nVosWLaV(+354) OZR%2BykvX1f1jfZ95tTCuY%3D&reserved=0)
5758710

www.uua.is

is -

[Fyrirvari/

Disclaime

r



Vinsamlegast hugið að umhverfinu áður en tölvupósturinn er prentaður og samgöngumáti valinn.

Please consider the environment before printing and choosing transport.



Samskipti í beiðni:

uua@uua.is - Í dag 14:45

[2025 10 24 Kæra til ÚUA - undirritað.pdf](#) (258 kB)

[Fskj. 1A.pdf](#) (1.65 MB)

[Fskj. 1B.pdf](#) (1.59 MB)

[Fskj. 1C.pdf](#) (746 kB)

[Fskj. 1D.pdf](#) (3.24 MB)

[Fskj. 2.pdf](#) (581 kB)

[Fskj. 3.pdf](#) (541 kB)

[Fskj. 4.pdf](#) (882 kB)


[Fskj. 5.pdf](#) (382 kB)

[Fskj. 6.pdf](#) (1004 kB)

Vinsamlegast svaraðu viðkomandi á eftirfarandi netfang: uua@uua.is

This email was sent by the [Email This Issue](#) Cloud addon

Reglur um trúnað í tölvupóstsamskiptum: <http://www.reykjavik.is/trunadur>



Úrskurðarnefnd umhverfis- og auðlindamála

Borgartúni 21
105 Reykjavík

sent rafrænt á uua@uua.is

Reykjavík, 24. október 2025

KÆRA

1. Kærendur

Garðheimar Gróðurvörur ehf., kt. 411091-1209, Álfabakka 6, 109 Reykjavík og Gardenia fasteignir ehf., kt. 421020-0510, til heimilis á sama stað.

2. Hin kærða ákvörðun

Ákvörðun skipulags- og byggingarfulltrúa Reykjavíkurborgar, dags. 24. september 2025, um álagningu dagsekta að fjárhæð 150.000 krónur á dag frá og með 26. september 2025 fyrir hvern þann dag sem það dregst að slökkva á skilti og fjarlægja það af lóð nr. 6 við Álfabakka í Reykjavík (fskj. 3).

3. Aðild

Garðheimar Gróðurvörur ehf. reka verslunina Garðheima og heildsölu með ýmsar garðyrkjuvörur að Álfabakka 6, Reykjavík. Gardenia fasteignir ehf. er dótturfélag Garðheima Gróðurvara ehf. og eigandi fasteignarinnar að Álfabakka 6, Reykjavík. Samkvæmt ótímabundnum leigusamningi leigja Garðheimar Gróðurvörur ehf. fasteignina að Álfabakka 6, fastanúmer F2517191, af dótturfélaginu, Gardeniu fasteignum ehf. Hin kærða ákvörðun snertir því hagsmuni beggja kærenda og eiga þeir báðir beinna, verulegra, sérstakra og lögvarinna hagsmuna að gæta af úrlausn málsins, sbr. 3. mgr. 4. gr. laga nr. 130/2011 um úrskurðarnefnd umhverfis- og auðlindamála. Verður hér eftir vísað til Garðheima Gróðurvörur ehf. og Gardeniu fasteigna ehf. sem kærenda.

4. Kröfugerð

Kærendur gera *í fyrsta lagi* þá kröfu að réttaráhrifum hinnar kærðu ákvörðunar um dagsektir verði frestað á meðan mál þetta er til meðferðar fyrir úrskurðarnefndinni.

Kærendur gera *í öðru lagi* þá kröfu að hin kærða ákvörðun verði felld úr gildi og lagt verði fyrir byggingarfulltrúa að taka óafgreiddar umsóknir kærenda til lögmætrar meðferðar.

5. Kæruheimild og kærufrestur

Um kæruheimild vísast til 59. gr. laga nr. 160/2010 um mannvirki. Samkvæmt ákvæðinu sæta stjórnvaldsákvarðanir, sem teknar eru á grundvelli laganna, kæru til úrskurðarnefndar umhverfis- og auðlindamála. Kærufrestur er einn mánuður skv. 2. mgr. 4. gr. laga nr. 130/2011 um úrskurðarnefnd umhverfis- og auðlindamála. Kært er innan kærufrests.

6. Málsatvik

1. Samkvæmt Aðalskipulagi Reykjavíkur 2040 tilheyrir lóðin og byggingin að Álfabakka 6 borgarhluta 6, Breiðholti og er á skilgreindu miðsvæði, M12 Mjódd. Á svæðinu er í gildi deiliskipulag Suður-Mjóddar, upphaflega samþykkt í borgarráði 21. janúar 2009, með síðari breytingum samþykktum af borgarráði þann 19. nóvember 2020, þar sem lóðinni Álfabakka 4 var skipt upp í tvær lóðir; Álfabakka 4 og Álfabakka 6. Í deiliskipulagsbreytingunni var sett sérstakt ákvæði um auglýsingaskilti: „Á hvorri lóð eða við lóðarmörk er heimilt að reisa eitt auglýsingaskilti sem tengist starfseminni, en þau skal færa inn á aðaluppdrætti. Eitt auglýsingaskilti meðfram Álfabakka innan lóðar og rúmast innan hæðarskilmála byggingarreits eða að hámarki 12 m, 3 m breitt og hámark 12 m² að flatarmáli.“
2. Aðaluppdrættir hússins nr. 6 að Álfabakka eru frá 20. apríl 2021. Á þeim má sjá staðsetningu auglýsingaskiltisins við lóðarmörk auk þess sem um það er fjallað í byggingarlýsingu þar sem segir: „Í deiliskipulagi er heimild fyrir einu auglýsingaskilti sem tengist starfseminni, staðsett meðfram Álfabakka, 12 metra hátt, 3 metra breitt og 12 m² að flatarmáli.“ Aðaluppdrættirnir voru yfirfarnir og staðfestir af byggingarfulltrúanum í Reykjavík með rafrænni undirritun (fskj. 1).
3. Þann 31. maí 2022 óskuðu kærendur álits Vegagerðarinnar á uppsetningu stafræns auglýsingaskiltis við Álfabakka út frá uppdrætti frá PK arkitektum. Með svarpósti frá Vegagerðinni, dags. 11. júlí s.á., kom fram sú afstaða Vegagerðarinnar að stofnunin teldi megintilgang auglýsingaskiltisins ekki til þess fallinn að fanga athygli umferðar Reykjanesbrautar og skapa þannig hættu, heldur fyrst og fremst þann að vera leiðarvísir (fskj. 4).
4. Með umsókn, dags. 25. ágúst 2022, sóttu kærendur um byggingarleyfi fyrir 8,6 m² stafrænu auglýsingaskilti á lóð nr. 6 við Álfabakka. Á afgreiðslufundi byggingarfulltrúa þann 13. september 2022 var málinu vísað til umsagnar skipulagsfulltrúa. Á embættisafgreiðslufundi skipulagsfulltrúa 15. september s.á. var málinu vísað til umsagnar verkefnastjóra.
5. Fyrir liggur umsögn verkefnastjóra, dags. 6. október 2022, þar sem fram kemur að í deiliskipulaginu sé ekki tekið fram „um hvernig skiltið sé en gera má ráð fyrir að hér sé um venjulegt skilti að ræða, allt að 12 m² að flatarmáli.“ (fskj. 5) Var tekið neikvætt í uppsetningu á 8,6 m² stafrænu skilti þar sem það samræmdist ekki samþykkt um skilti í Reykjavík, frá maí 2020, hvað stærð varðaði. Fram kom að ekki yrði gerð athugasemd við auglýsingaskilti, ekki stafrænt, sömu stærðar.

6. Þann 11. október 2022 var umsókn kæranda um byggingarleyfi aftur tekin fyrir á afgreiðslufundi byggingarfulltrúa. Vísað var í umsögn skipulagsfulltrúa, dags. 6. október s.á. og til athugasemda og var málinu frestað.
7. Á afgreiðslufundi skipulagsfulltrúa, dags. 10. maí 2024, var tekin fyrir fyrirspurn kæranda, dags. 24. apríl 2024, ásamt greinargerð PK arkitekta, um breytingu á deiliskipulagi Suður-Mjóddar, með síðari breytingum, vegna lóðarinnar nr. 6 við Álfabakka. Fól breytingatillagan í sér heimild til að reisa skilti samkvæmt uppdrætti PK arkitekta, dags. 25. ágúst 2022. Var málinu vísað til umsagnar verkefnastjóra.
8. Fyrir liggur umsögn verkefnastjóra, dags. 27. júní 2024, þar sem fram kemur að breytingin felist í því að heimila stafrænt auglýsingaskilti að hámarki 8,5 m², með búnaði sem aðlagar birtustig skiltisins að umhverfisbirtu. Í umsögninni var vísað til þess að í gildi væri samþykkt um skilti í Reykjavík frá maí 2020 og orðrétt rakin ákvæði úr samþykktinni. Þá sagði að stafræn skilti sem væru stærri en 10 m² skyldu vera með búnaði þar sem ljóminn lagaði sig að umhverfisbirtu. Þá sagði að öll skilti sem stæðu við stofn- og tengibrautir ættu að vera búin slíkum búnaði. Í umsögninni var vísað til ódagsettrar umsagnar samgöngustjóra Reykjavíkurborgar þar sem fram kom að núverandi staðsetning auglýsingaflatarins gerði það að verkum að sjónlengdir væru minni en ákjósanlegar væru, hvort heldur sem flöturinn væri stafrænn eða ekki. Auglýsingaflötur á þessum stað hefði þannig í för með sér neikvæð áhrif á umferðaröryggi. Þá var jafnframt vísað til ódagsettrar umsagnar Vegagerðarinnar sem lagðist ekki gegn uppsetningu stafræns skiltis af stærðinni 8,6 m² á lóð kæranda. Var niðurstaða verkefnastjóra skipulagsfulltrúa sú að gerðar voru skipulagslegar athugasemdir við breytingu á deiliskipulagi vegna uppsetningu stafræns skiltis á lóð kæranda, en „heimilt að hafa hefðbundið auglýsingaskilti á lóðinni sbr. gildandi deiliskipulag en gæta þyrfti að því að staðsetning þess hefðu ekki neikvæð áhrif á umferðaröryggi.“ (fskj. 6).
9. Með bréfi deildar afnota og eftirlits á umhverfis- og skipulagssviði Reykjavíkurborgar, dags. 22. ágúst 2025, var kærendum gert að slökkva án tafar á skilti á lóðinni Álfabakka 6, Reykjavík, og fjarlægja það af lóðinni. Yrðu þeir ekki við þeirri kröfu innan 30 daga boðaði byggingarfulltrúi þau áform að leggja á dagsektir að fjárhæð 150.000 kr. fyrir hvern dag sem það kynni að dragast að ljúka verkinu. Með bréfi dags. 8. september s.á. komu kærendur á framfæri andmælum sínum þar sem þeir mótmæltu harðlega kröfum byggingarfulltrúa sem og boðuðum áformum um þvingunaraðgerðir.
10. Með umsókn, dags. 16. september 2025, lögðu PK arkitektar inn tillögu fyrir hönd kæranda að breytingu á skilmálum deiliskipulags fyrir Suður-Mjódd vegna auglýsingaskilta. Fólst umsótt breyting í því að til áréttingar yrði tekið fram í kafla um auglýsingaskilti að heimild til uppsetningar auglýsingaskiltis tæki til allra gerða skilta, hvort heldur sem þau væru upplýst, óupplýst eða stafræn. Hefur umsóknin ekki verið tekin til meðferðar.
11. Þann 29. september 2025 var kærendum fyrst kunnugt um bréf skipulags- og byggingarfulltrúa, dags. 24. september 2025. Hefur bréfið að geyma hina kærðu ákvörðun. Á bls. 2 í bréfinu var athygli kæranda vakin á því að hægt væri að leggja

inn umsókn um byggingarleyfi að nýju og koma þá röksemdum úr andmælabréfi kæranda á framfæri í umsóknarferli þess máls (fskj. 2).

12. Til samræmis við ábendingu skipulags- og byggingarfulltrúa lögðu PK arkitektar inn umsókn um byggingarleyfi fyrir umræddu skilti, með erindi, dags. 15. október 2025. Hefur umsóknin ekki verið tekin til meðferðar.

7. Málsástæður

Krafa kæranda um stöðvun réttaráhrifa

13. Kærendur gera í *fyrsta lagi* þá kröfu að réttaráhrifum hinnar kærðu ákvörðunar verði frestað á meðan mál þetta er til meðferðar fyrir úrskurðarnefndinni. Kröfu sinni til stuðnings vísa kærendur til eftirfarandi sjónarmiða:
14. Í 1. mgr. 5. gr. laga nr. 130/2011 um úrskurðarnefnd umhverfis- og auðlindamála er tekið fram að kæra til úrskurðarnefndarinnar fresti ekki réttaráhrifum kærðrar ákvörðunar en jafnframt er kæranda þar heimilað að krefjast stöðvunar framkvæmda til bráðabirgða séu þær hafnar eða yfirvofandi. Tekið er fram í athugasemdum með 5. gr. í frumvarpi því sem varð að lögum nr. 130/2011 að ákvæði greinarinnar byggist á almennum reglum stjórnssýsluréttar um réttaráhrif kæru og heimild úrskurðaraðila til að fresta réttaráhrifum ákvörðunar, sbr. 29. gr. stjórnssýslulaga nr. 37/1993. Í lögskýringargögnum með 29. gr. stjórnssýslulaga er tiltekið að heimild til frestunar réttaráhrifa þyki nauðsynleg þar sem kæruheimild geti ella orðið þýðingarlaus. Þar kemur einnig fram að almennt mæli það á móti því að réttaráhrifum ákvörðunar sé frestað ef fleiri en einn aðili er að máli sem eigi gagnstæðra hagsmuna að gæta. Það mæli hins vegar með því að fresta réttaráhrifum ákvörðunar ef aðili máls er aðeins einn og ákvörðun er íþyngjandi fyrir hann, veldur honum t.d. tjóni, líkt og á við í máli þessu. Þá segir í athugasemdunum að þetta sjónarmið vegi sérstaklega þungt í þeim tilvikum þar sem erfitt yrði að ráða bót á tjóninu enda þótt ákvörðunin yrði síðar felld úr gildi af hinu æðra stjórnvaldi.
15. Kærendur telja að fallast beri á kröfu þeirra um frestun réttaráhrifa og benda á í því sambandi að í málinu er kærð sú ákvörðun skipulags- og byggingarfulltrúa Reykjavíkurborgar frá 24. september 2025 að leggja á dagsektir að fjárhæð 150.000 kr. fyrir hvern dag sem þeir draga að verða við kröfu um að slökkva á og fjarlægja skilti sem tilheyrir húsi nr. 6 við Álfabakka í Reykjavík. Með kærunni hafa kærendur þannig nýtt sér lögvarinn rétt sinn og heimild til að bera lögmæti hinnar kærðu ákvörðunar undir úrskurðarnefndina. Ef réttaráhrifum verður ekki frestað blasir við að kæruheimild til úrskurðarnefndarinnar er þýðingarlaus með öllu. Um íþyngjandi ákvörðun er að ræða, sem beinist einungis að kærendum, engum öðrum. Þá hefur ákvörðunin í för með sér mikinn tilkostnað, rask og verðmætasóun. Þá verður að mati kæranda ekki framhjá því litið í þessu sambandi að umsókn þeirra um byggingarleyfi, dags. 15. október 2025, hefur enn ekki verið tekin til meðferðar. Með vísan til alls framanritaðs sé einsýnt að fallast beri á kröfu kæranda um stöðvun réttaráhrifa.

Krafa kærenda um að hin kærða ákvörðun verði felld úr gildi

16. Kærendur gera í öðru lagi þá kröfu að hin kærða ákvörðun verði felld úr gildi. Byggja þeir á því að hin kærða ákvörðun sé haldin svo verulegum annmörkum að hana beri að fella úr gildi. Vísar kærendur til eftirfarandi sjónarmiða til stuðnings þeirri kröfu sinni:

Framkvæmdin í góðri trú. Kærendur með réttmætar væntingar um lögmæti hennar.

17. Samkvæmt 1. mgr. 2. gr. og 13. tl. 3. gr. laga nr. 160/2010 um mannvirki fellur skilti eins og hér um ræðir undir gildissvið laganna. Í 8. tl. 1. mgr. 60. gr. laganna segir að kveða skuli á um staðsetningu, gerð og frágang skilta í reglugerð auk ákvæða um hvaða skilti skuli háð byggingarleyfi. Í 2. mgr. gr. 2.5.1. í byggingarreglugerð nr. 112/2012 er kveðið á um að sækja skuli um byggingarleyfi fyrir öllum frístandandi skiltum og skiltum á byggingum sem eru yfir 1,5 m². Undanþegin byggingarleyfissskyldu eru þó skilti allt að 2,0 m² að stærð sem ætlað er að standa skemur en tvær vikur sem og skilti sem sett eru upp samkvæmt ákvæðum umferðarlaga. Fyrir liggur að skilti kærenda er 8,6 m² og því óumdeilt að það er byggingarleyfissskilt.
18. Kærendur byggja á því að synjun byggingarfulltrúa á umsókn um byggingarleyfi hafi frá upphafi verið ólögmæt enda hafi umsóknin uppfyllt öll lögákveðin skilyrði. Í 1. mgr. 13. gr. laga nr. 160/2010 eru rakin skilyrði fyrir útgáfu byggingarleyfis. Í 1. tölulið ákvæðisins er að finna það frumskilyrði að mannvirkið og notkun þess samræmist skipulagsáætlunum á svæðinu. Samskonar skilyrði er að finna í 1. mgr. gr. 2.5.1. byggingarreglugerðar þar sem kveðið er á um að stærð og staðsetning skilta skuli vera í samræmi við ákvæði gildandi skipulags.
19. Lóðin og bygging kærenda að Álfabakka 6 tilheyrir skilgreindu miðsvæði M12 Suður-Mjódd samkvæmt Aðalskipulagi Reykjavíkur 2040. Á svæðinu er í gildi deiliskipulag Suður-Mjóddar, upphaflega samþykkt í borgarráði 21. janúar 2009, með síðari breytingum samþykktum af borgarráði þann 19. nóvember 2020, þar sem fjallað er sérstaklega um auglýsingaskilti en þar segir orðrétt: „Á hvorri lóð eða við lóðarmörk er heimilt að reisa eitt auglýsingarskilti sem tengist starfseminni, en þau skal færa inn á aðaluppdrætti. Eitt auglýsingaskilti meðfram Álfabakka innan lóðar og rúmast innan hæðarskilmála byggingarreits eða að hámarki 12 m, 3 m breitt og hámark 12 m² að flatarmáli.“
20. Þannig liggur fyrir að þegar kærendur keyptu lóðina og fengu úthlutaðan byggingarrétt með samþykki borgarráðs þar um, dags. 24. febrúar 2022, var framangreint deiliskipulag í gildi á svæðinu, með tilgreindum skilmálum um auglýsingaskilti, staðsetningu þess, stærð og gerð. Bókað var í fundargerð borgarráðs að það væri fagnaðarefni að þessi rótgróna verslun verði áfram í Breiðholti, en kærendur höfðu neyðst til að flytja höfuðstöðvar sínar vegna breytinga á skipulagsáætlunum í Mjódd og Stekkjarbakka hvar verslun kærenda var á mun meira áberandi stað. Var auglýsingaskiltið í deiliskipulaginu, stærð, gerð og staðsetning, því forsenda fyrir kaupum kærenda á umræddri lóð.
21. Auglýsingaskiltið er staðsett meðfram Álfabakka, innan lóðar nr. 6. Skiltið er 8,6 m² en má samkvæmt deiliskipulagi vera að hámarki 12 m². Þannig er skiltið vel innan

heimillar hámarksstærðar. Í deiliskipulaginu eru engar kvaðir eða skilmálar um gerð eða eiginleika skiltisins, eingöngu um stærð. Þannig liggur fyrir að staðsetning, stærð og gerð skiltisins er í fullu samræmi við gildandi skipulagsáætlanir og uppfyllir þannig lögákveðin skilyrði 1. tölul. 1. mgr. 13. gr. laga nr. 160/2010 og 1. mgr. gr. 2.5.1. byggingarreglugerðar. Þannig höfðu kærendur réttmætar væntingar til þess að fá umsókn sína um byggingarleyfi samþykkt.

22. Framangreindu til viðbótar er í 2. tölulið 1. mgr. 13. gr. laga um mannvirki að finna það skilyrði fyrir útgáfu byggingarleyfis að leyfisveitandi hafi yfirfarið og staðfest aðaluppdrætti. Á samþykktum aðaluppdráttum fyrir húsið nr. 6 að Álfabakka má sjá staðsetningu skiltisins á lóðarmörkum auk þess sem um það er fjallað í byggingarlýsingu þar sem segir: *„Í deiliskipulagi er heimild fyrir einu auglýsingaskilti sem tengist starfseminni, staðsett meðfram Álfabakka, 12 metra hátt, 3 metra breitt og 12 m² að flatarmáli.“* Hefur þessi texti verið í byggingarlýsingu frá upphafi. Þar að auki hefur staðsetningin skiltisins verið sýnd frá upphafi á sama stað á afstöðumynd, grunnmynd jarðhæðar og útliti. Hefur byggingarfulltrúinn í Reykjavík yfirfarið og staðfest aðaluppdrættina, án nokkurra athugasemda sem skapaði eðlilega réttmætar væntingar hjá kærendum til þess að fá umsókn sína um byggingarleyfi samþykkt – enda einn og sami leyfisveitandinn sem yfirfór og staðfesti aðaluppdrættina með hliðsjón af gildandi skipulagsáætlunum og tók síðan umsókn kærenda um byggingarleyfi til meðferðar.
23. Þá benda kærendur á að synjun byggingarfulltrúa hafi jafnframt byggt á neikvæðri umsögn skipulagsfulltrúa frá 6. október 2022 sem hafi verið órökstudd og í raun í ósamræmi við gildandi skipulagsáætlanir og samþykkt um skilti í Reykjavíkurborg frá 2020. Í téðri umsögn kom fram að í gildandi deiliskipulagi væri ekki tekið fram *„hvernig skiltið sé“*, en síðan sagði orðrétt: *„[G]era má ráð fyrir að hér sé um venjulegt skilti að ræða, allt að 12 m² að flatarmáli.“* Í umsögninni er hins vegar hvorki tilgreint á hvaða grundvelli skipulagsfulltrúi skýrir umrædda heimild í deiliskipulagi svo þröngri skýringu, að tegund hafi áhrif á niðurstöðuna, né heldur er að finna rökstuðning fyrir því hvers vegna hann grípur til þess, enda ómálefnalegt líkt og nánar verður rakið.
24. Í framhaldinu fjallar skipulagsfulltrúi um samþykkt um skilti í Reykjavík og kemst að þeirri niðurstöðu að samkvæmt samþykktinni sé ekki heimilt að setja stærra skilti en 0,5 m² inni á lóð kærenda, sé það stafrænt. Niðurstaða skipulagsfulltrúa var því sú að neikvætt var tekið í uppsetningu á 8,6 m² stafrænu skilti við hús nr. 6 við Álfabakka en ekki gerð athugasemd við auglýsingaskilti, ekki stafrænt, sömu stærðar. Að mati kærenda er vandséð hvaða málefnalegu sjónarmið bjuggu að baki þeirri niðurstöðu skipulagsfulltrúa eða hvernig sú niðurstaða hafi verið í samræmi við gildandi skipulag, sem skipulagsfulltrúa ber eðlilega að starfa eftir.
25. Í þessu sambandi er minnt á að samþykkt um skilti í Reykjavík frá 2020 var staðfest á fundi borgarráðs 7. maí 2020 og birt á vef borgarinnar 11. maí s.á. og hafði því nýlega verið til umfjöllunar og samþykktar í borgarráði þegar deiliskipulagið, með skilmálum um staðsetningu, stærð og gerð auglýsingaskiltis, var samþykkt á vettvangi sama stjórnvalds, borgarráðs, í nóvember 2020. Við þá málsmeðferð var ekkert átt við umfjöllun um heimild fyrir auglýsingaskilti á lóðum nr. 4 og 6 við

Álfabakka. Þá liggur jafnframt fyrir að umrædd deiliskipulagsbreyting hafði verið til umfjöllunar hjá skipulagsfulltrúa og var samþykkt á embættisafgreiðslufundi skipulagsfulltrúa þann 29. janúar 2021, án athugasemda við tilgreinda heimild.

26. Kærendur byggja á því að umsögn skipulagsfulltrúa frá 6. október 2022 hafi ekki bara verið órökstudd og ómálefnaleg heldur einnig í hróplegu ósamræmi við ákvæði samþykktar um skilti í Reykjavík og þar af leiðandi gildandi skipulagsáætlanir. Því til stuðnings vísa kærendur til 1. gr. samþykktar um skilti í Reykjavík sem segir að í deiliskipulagi sé heimilt að þrengja eða veita víðari heimildir en það sem reglur samþykktarinnar kveða á um. Líkt og rakið hefur verið heimilar gildandi deiliskipulag allt að 12 m² auglýsingaskilti innan lóðar nr. 6 við Álfabakka – hvort heldur sem um er að ræða stafrænt skilti eða ekki. Um er að ræða stærra skilti heldur en heimilað er samkvæmt ákvæðum um skilti á miðsvæðum og þjónustukjörnum í samþykkt um skilti í Reykjavík. Deiliskipulagið veitir þannig víðari heimildir en reglur samþykktarinnar. Framangreind rétt hæð reglna er áréttuð í gr. 1.3. samþykktarinnar þar sem segir efnislega að stangist ákvæði samþykktarinnar á við ákvæði gildandi laga eða skipulagsáætlana þá víkja ákvæði samþykktarinnar, m.ö.o. trompa ákvæði í gildandi skipulagsáætlunum ákvæði í samþykkt um skilti í Reykjavíkurborg. Með vísan til framanritaðs blasir við að ákvæði í gildandi deiliskipulagi sem heimilar allt að 12 m² auglýsingaskilti víkur til hliðar þeim takmörkunum á stærð skiltis sem fram koma í títtnefndri samþykkt um skilti.
27. Framangreindu til viðbótar er í kafla 3 samþykktarinnar að finna almenn ákvæði sem ná til allra skilta óháð stærð, staðsetningu og tæknibúnaði, innan einkalóða og á borgarlandi. Í gr. 3.6. er tekið fram að leyfilegt sé að setja upp ný stafræn auglýsingaskilti sem séu stærri en 10 m² ef fyrir sé sambærilegt skilti, s.s. flettiskilti, eða ef deiliskipulag heimili slík skilti. Slík skilti megji þó ekki vera nær vegbrún gatnamóta, götu eða vegvísun og öðrum umferðarbúnaði en 20 m. Þá er sömu reglu að finna í gr. 4.8. þar sem fjallað er um skilti sem snúa að stofn- og tengibrautum. Fyrir liggur álit Vegagerðarinnar frá 11. júlí 2022 þar sem fram kemur að Vegagerðin telji að megintilgangur skiltisins sé fyrst og fremst sá að vera leiðarvísir en ekki að fanga athygli ökumanna Reykjanesbrautar (fskj. 4).
28. Fyrir liggur því að synjun byggingarfulltrúa á byggingarleyfi byggði á neikvæðri umsögn skipulagsfulltrúa sem með vísan til framanritaðs hafði enga heimild til þess að skýra skilmála í deiliskipulagi svo þröngri skýringu þar sem slíkt fór gegn gr. 1., gr. 1.3. og gr. 3.6. í samþykkt um skilti í Reykjavík um rétt hæð reglna sem um þetta gilda. Auk þess er augljóslega ómálefnalegt að synja umsókn um byggingarleyfi fyrir skilti sem rúmast innan heimilda og skilmála deiliskipulags á þeim grundvelli einum að um sé að ræða stafrænt auglýsingaskilti, en ekki upplýst auglýsingaskilti. Hefur endá ekki verið rökstutt hver munurinn er þar á milli með hliðsjón af umsókn kærenda. Líkt og byggingarfulltrúa og skipulagsfulltrúa ætti að vera kunnugt hefur ekki verið fallist á það sem málefnaleg sjónarmið í sambærilegum málum að umsækjandi um byggingarleyfi muni brjóta skilyrði byggingarleyfis.
29. Framkvæmd kærenda var því í góðri trú og kærendur höfðu réttmætar væntingar um lögmæti hennar. Stærð skiltisins og gerð þess sé í samræmi við skilmála í deiliskipulagi svæðisins og staðsetning þess innan lóðar í samræmi við samþykkt

aðaluppdrætti. Uppfylli það því öll lögákveðin skilyrði fyrir útgáfu byggingarleyfis, auk þess sem það veldur engri röskun á almannahagsmunum, líkt og nánar verður rakið.

Hin kærða ákvörðun braut gegn rannsóknarreglu 10. gr. stjórnsýslulaga

30. Kærendur benda á að hin kærða ákvörðun um að skiltið verði fjarlæggt og beiting þvingunarúrræða í formi dagsekta að fjárhæð 150.000 krónur sé ótvírætt íþyngjandi ákvörðun.
31. Í hinni kærðu ákvörðun kemur fram að krafa um að skiltið verði fjarlæggt byggir á 2. mgr. 55. gr. laga um mannvirki. Í lögskýringargögnum með 55. gr. laganna segir að sú breyting hafi verið gerð frá fyrri lögum, varðandi mannvirki sem reist séu í óleyfi, að byggingarfulltrúa sé heimilt en ekki skylt að krefjast niðurrifs þeirra, að jarðrask sé afmáð eða starfsemi sé hætt. Auk þess kemur þar fram að eðlilegt sé að ákvörðun um beitingu slíkra úrræða sé metin í hverju tilviki, m.a. með tilliti til meðalhófs. Ákvörðun um niðurrif mannvirkis er því háð mati stjórnvalds hverju sinni og gefur sveitarfélögum kost á að bregðast við sé gengið gegn almannahagsmunum þeim er búa að baki mannvirkjalögum, svo sem skipulags-, öryggis- og heilbrigðishagsmunum. Þótt beiting slíkra úrræða sé háð mati stjórnvalds þarf ákvörðun þess efnis að vera rökstudd með viðhlítandi hætti, m.a. með hliðsjón af þeim hagsmunum sem búa að baki fyrrgreindum lagaheimildum og fylgja þarf meginreglum stjórnsýsluréttarins, s.s. um rannsókn máls skv. 10. gr. stjórnsýslulaga og að málefnaleg sjónarmið búi að baki ákvörðun.
32. Samkvæmt rannsóknarreglunni ber stjórnvaldi skylda til að sjá til þess að málsatvik stjórnsýslumáls séu nægjanlega upplýst áður en ákvörðun er tekin í því. Mál telst nægjanlega upplýst þegar þeirra upplýsinga hefur verið aflað sem eru nauðsynlegar til þess að hægt sé að taka efnislega rétta ákvörðun. Um nánari afmörkun verður m.a. að líta til þess hversu mikilvægt málið er og hversu nauðsynlegt það er að taka skjóta ákvörðun því. Því tilfinnanlegri eða meira íþyngjandi sem stjórnvaldsákvörðun er, þeim mun strangari kröfur verður almennt að gera til stjórnvalds um að það gangi úr skugga um að upplýsingar sem búa að baki ákvörðun séu sannar og réttar.
33. Kærendur benda á þá staðreynd að deiliskipulagið heimilar auglýsingaskilti við lóðarmörk, þ.e. „*meðfram Álfabakka innan lóðar*“. Þá liggur fyrir að skipulagsfulltrúi yfirfór og staðfesti deiliskipulagið, án nokkurra athugasemda – sama á við um borgarráð hvaðan byggingarfulltrúi sækir umboð sitt. Þá má sjá staðsetningu skiltisins á samþykktum aðaluppdráttum fyrir húsið nr. 6 að Álfabakka, sem samþykktir voru af byggingarfulltrúa í apríl 2021, auk þess sem um það er fjallað í byggingarlýsingu að skiltið sé staðsett meðfram Álfabakka. Frá upphafi hefur staðsetning skiltisins verið sýnd á öllum afstöðumyndum, grunnmynd jarðhæðar og útlitum. Hefur byggingarfulltrúinn í Reykjavík yfirfarið og staðfest uppdrættina, án nokkurra athugasemda. Kærendur höfðu ekkert með staðsetningu umrædds hjólastígs að segja. Þvert á móti verður að ganga út frá því að sérfræðingar Reykjavíkurborgar hafi einmitt staðsett stíginn með hliðsjón af gildandi deiliskipulagi og samþykktum aðaluppdráttum hvar skilmálar um skiltið koma fram og staðsetning þess með myndrænum hætti.

34. Í hinni kærðu ákvörðun er vísað til þess að mat byggingarfulltrúa á nauðsyn þess að skiltið verði fjarlægt byggja á öryggissjónarmiðum. Því til stuðnings vísaði byggingarfulltrúi til ábendinga frá vegfarendum sem hafi borist um að skilti kærenda hindri sýn vegfarenda og geti valdið slyshættu. Til viðbótar vísaði byggingarfulltrúi til þess að í umsögn skipulagsfulltrúa, dags. 27. júní 2024, hafi verið byggt á mati skrifstofu samgöngustjóra. Í umsögninni er vísað til mats samgöngustjóra Reykjavíkurborgar, sem þó er ódagsett, en þar kemur fram að staðsetning auglýsingaskiltisins sé „óheppileg m.t.t. umferðaröryggis“ þar sem skiltið sé staðsett nærri útkeyrslu af lóð kærenda sem þverar hjólastíg. Engin önnur rannsókn, gögn, forsendur eða upplýsingar búa þannig að baki hinni kærðu ákvörðun og þar með mati byggingarfulltrúa á öryggishagsmunum, s.s. álit frá samgöngudeild umhverfis- og skipulagssviðs.
35. Kærendur byggja á því að með hliðsjón af rannsóknarreglu 10. gr. stjórnsýslulaga verði að telja að byggingarfulltrúa hafi ekki verið stætt á að styðja hina kærðu ákvörðun, sem er ótvírætt íþyngjandi ákvörðun, með þeim rökum að ábendingar hafi borist frá vegfarendum og að mat samgöngustjóra sé að staðsetningin skiltisins sé óheppileg. Byggja kærendur á því að full ástæða hafi verið fyrir byggingarfulltrúa til að rannsaka málið frekar. Um sé að ræða grundvallaratriði varðandi rannsókn málsins. Engin formleg rannsókn fór því fram á því hvort umrætt skilti hefði raunverulega nokkra áhrif á umferðaröryggi, heldur einungis byggt á óskýrum nafnlausum ábendingum. Brot á rannsóknarreglu sé verulegur annmarki á hinni kærðu ákvörðun sem leiða eigi til ógildingar hennar.
36. Í hinni kærðu ákvörðun kemur fram að beiting þvingunarúrræða í formi dagsektar byggja á 2. mgr. 56. laga um mannvirki og gr. 2.9.2. byggingarreglugerðar. Kærendur telja sömu sjónarmið og rakin hafa verið eiga við um ákvörðun byggingarfulltrúa um beitingu þvingunarúrræða í formi dagsektar, að breyttu breytanda.

Hin kærða ákvörðun braut gegn meðalhófsreglu 12. gr. stjórnsýslulaga

37. Kærendur mótmæla því harðlega að ábyrgð á staðsetningu hjólastígs og þar með umferðaröryggi sé færð yfir á þá, þegar ljóst liggur fyrir að allar heimildir til staðsetningar skiltisins lágu fyrir frá upphafi í gildandi skipulagsáætlunum og samþykktum aðaluppdráttum. Telja kærendur að með því sé vegið freklega að hagsmunum og réttindum umbjóðanda míns sem byggingarfulltrúa og skipulagsfulltrúa ber sem stjórnvaldi að taka tillit til. Benda kærendur á að hin kærða ákvörðun sé verulega íþyngjandi, enda farið fram á eyðileggingu mikilla verðmæta og það á ólögætum grunni, líkt og ítarlega hefur verið rakið.
38. Kærendur byggja á því að stjórnvaldi sé skylt að virða meðalhófsregluna sem er lögfest í 12. gr. stjórnsýslulaga, en meginsjónarmiðin að baki reglunni eru þau að stjórnvaldi er ekki aðeins skylt að líta til þess markmiðs sem starf þess stefnir að heldur ber því einnig að taka tillit til hagsmuna og réttinda þeirra aðila sem athafnir stjórnvaldsins beinist að. Ber stjórnvaldi að fara ákveðinn milliveg á milli þessara andstæðu sjónarmiða. Í ákvæðinu felst jafnframt að ef fleiri úrræða sé völ sem þjónað geti lögmætu markmiði skuli velja það úrræði sem vægast sé og að hóf verði að vera í beitingu þess úrræðis sem valið hafi verið og megi því ekki ganga lengra

en nauðsyn beri til. Þannig er byggingarfulltrúa og skipulagsfulltrúa skylt að meta þessi andstæðu sjónarmið sem vegast á í málinu.

39. Með vísan til framanritaðs telja kærendur að hin kærða ákvörðun brjóti gegn meðalhófsreglu stjórnssýsluréttarins, bæði 12. gr. stjórnssýslulaga og óskrifuðum reglum stjórnssýsluréttarins, enda hafi vægari úrræði ekki verið reynd til að ná fram lögmætum markmiðum um umferðaröryggi. Í þessu sambandi benda kærendur á að ábyrgð á því að tryggja umferðaröryggi á hjólastíg sem Reykjavíkurborg staðsetti við lóðarmörk kæranda og útkeyrslu af bílaplani lóðarinnar, hvílir á herðum Reykjavíkurborgar sem veghaldara en ekki á kærendum sem lóðarhafa og eiganda skiltis sem staðsett er innan lóðar í fullu samræmi við gildandi skipulagsáætlanir og samþykkt aðaluppdrætti.
40. Kærendur benda á í þessu sambandi að þann 1. mars 2024 tók gildi ný reglugerð nr. 250/2024 um umferðarmerki og notkun þeirra. Í 27. gr. reglugerðarinnar er að finna upptalningu undirmerkja sem notuð eru með öðrum umferðarmerkjum til nánari leiðbeininga eða skýringa. Í ákvæðinu er að finna skilti merkt 826.1 - Umferð hjólandi vegfarenda úr báðum áttum en í lýsingu með skiltinu segir orðrétt: „Merki þetta er notað með merkinu **202 Biðskylda** eða **204 Stöðvunarskylda** og vekur athygli á því að von er á hjólandi umferð úr báðum áttum.“ Í viðauka I við reglugerðina er kveðið á um í 37. gr. að heimilt sé að „nota merki um biðskyldu til áréttingar þar sem ekið er inn á veg frá bifreiðastæði [...] þar sem ekið er yfir gangstíg, gangstétt eða hjólastíg sé það ekki augljóst af aðstæðum hvernig forgangi er háttað og talið að það hafi neikvæð áhrif á umferðaröryggi að sleppa merkingu.“ Að mati kæranda blasir við að þörf er á þessu skilti við alla tvíátta hjólastíga þar sem bílaumferð þverar hjólastíg til að tryggja umferðaröryggi. Á það við um útkeyrslu af bílastæði kæranda sem og á öðrum stöðum í borginni þar sem umferð þverar hjólastíg.
41. Líkt og áður greinir ber stjórnvaldi að velja það úrræði sem vægast er til að ná fram lögmætu markmiði, beita hófi í því úrræði og ganga ekki lengra en nauðsyn ber til – enda skylt að meta þau andstæðu sjónarmið sem vegast á. Með kröfu um að skiltið verði fjarlæggt er að mati kæranda gengið mun lengra en þörf er á til að ná fram lögmætu markmiði. Í því sambandi verður að hafa í huga að í umsögnum skipulagsfulltrúa hefur ekki verið lagst gegn því að hafa upplýst auglýsingaskilti, ekki stafrænt, sömu stærðar á lóðinni. Önnur og vægari úrræði sem fær eru til að ná fram settu markmiði eru því augljós og mun nærtækari, s.s. að setja upp biðskyldumerki og merki 826.1 við útkeyrslu af bílaplani umbjóðanda míns til að tryggja betur umferðaröryggi.
42. Í hinni kærðu ákvörðun vísar byggingarfulltrúi til þess að umferðarmerkingar bæti ekki úr skerðingu sjónlína af völdum skiltis kæranda. Kærendur benda á, líkt og rakið var að framan, að ekkert liggur fyrir um umrædda skerðingu sjónlína, hversu mikil skerðingin er, eða hvort tilfærsla skiltisins innan lóðar dugi, enda hefur engin rannsókn farið fram. Í öllu falli er umferðarmerkjum af framangreindu tagi ætlað að hafa þann tilgang að auka umferðaröryggi.
43. Loks benda kærendur á þeir hafa lagt inn tvö erindi til skipulags- og byggingarfulltrúa Reykjavíkurborgar sem enn hafa ekki fengið lögmæta meðferð, annars vegar tillögu að breytingu á gildandi deiliskipulagi og hins vegar útgáfu byggingarleyfis. Í ljósi

Þess verður ekki framhjá því komist að telja hina kærðu ákvörðun um að kærendur fjarlægi skiltið og beitingu dagsekta úr hófi fram.

44. Með vísan til alls framanritaðs og með hliðsjón af meðalhófsreglu stjórnisýsluréttarins, sbr. 12. gr. stjórnisýslulaga, byggja kærendur á því að byggingarfulltrúa hefði verið rétt að beita öðrum og vægari úrræðum til að tryggja umferðaröryggi, t.d. þeim úrræðum sem mælt er fyrir um í reglugerð um umferðarmerki og notkun þeirra. Hefur Reykjavíkurborg ekki fært viðhlítandi rök fyrir því að það sé ekki raunhæft eða mögulegt að beita þeim úrræðum. Brot á meðalhófsreglu sé verulegur annmarki á hinni kærðu ákvörðun sem leiða eigi til ógildingar hennar.

45. Með vísan til alls framanritaðs er þess krafist að úrskurðarnefnd umhverfis og auðlindamála felli úr gildi hina kærðu ákvörðun.

8. Almennur áskilnaður

Kærendur áskilja sér rétt til að leggja fram ný gögn og hafa uppi frekari rökstuðning fyrir kærinni eftir því sem tilefni gefst til.

Virðingarfyllst,

Ragnar Björgvinsson lögmaður

Fylgiskjöl með kæru þessari:

1. Aðaluppdrættir dags. 20. apríl 2021.
2. Bréf skipulags- og byggingarfulltrúa til kæranda, dags. 24. september 2025.
3. Bréf byggingarfulltrúa til kæranda, dags. 22. ágúst 2025.
4. Tölvupóstsamskipti kæranda og Vegagerðarinnar frá maí og júlí 2022.
5. Umsögn verkefnastjóra skipulagsfulltrúa, dags. 6. október 2022.
6. Umsögn verkefnastjóra skipulagsfulltrúa, dags. 27. júní 2024.

Ragnar Björgvinsson



Árið 2025, þriðjudaginn 4. nóvember, tók Arnór Snæbjörnsson, formaður úrskurðarnefndar umhverfis- og auðlindamála, með heimild í 3. mgr. 3. gr. laga nr. 130/2011, fyrir:

Mál nr. 164/2025, kæra á ákvörðun skipulags- og byggingarfulltrúans í Reykjavík frá 24. september 2025 um álagningu dagsekta vegna skiltis á lóð nr. 6 við Álfabakka.

Í málinu er nú kveðinn upp til bráðabirgða svofelldur

**úrskurður
um kröfu kæranda um stöðvun réttaráhrifa:**

Með bréfi til úrskurðarnefndar umhverfis- og auðlindamála, dags. 24. október 2025, er barst nefndinni sama dag, kæra Garðheimar Gróðurvörur ehf. og Gardenia fasteignir ehf., Álfabakka 6, ákvörðun skipulags- og byggingarfulltrúans í Reykjavík frá 24. september 2025 um álagningu dagsekta að fjárhæð kr. 150.000, frá og með 26. september s.á., fyrir hvern þann dag sem það dragist að slökkva á skilti og fjarlægja það af lóð nr. 6 við Álfabakka. Er þess krafist að ákvörðunin verði felld úr gildi og lagt verði fyrir byggingarfulltrúa að taka óafgreiddar umsóknir kæranda til lögmætrar meðferðar. Gera kærendur einnig kröfu um að réttaráhrifum hinnar kærðu ákvörðunar um dagsektir verði frestað á meðan málið er til meðferðar fyrir úrskurðarnefndinni. Verður nú tekin afstaða til þeirrar kröfu

Málsatvik og rök: Með umsókn, dags. 25. ágúst 2022, sóttu kærendur um byggingarleyfi fyrir 8,6 m² stafrænu auglýsingaskilti á lóð nr. 6 við Álfabakka. Í kjölfar neikvæðrar umsagnar skipulagsfulltrúa, dags. 6. október s.á., var erindinu synjað á afgreiðslufundi byggingarfulltrúa 11. s.m. Kærendur sóttu um byggingarleyfi á ný fyrir 11,6 m² stafrænu auglýsingaskipti á umræddri lóð 10. janúar 2024. Á afgreiðslufundi skipulagsfulltrúa 10. maí 2024 var lögð fram fyrirspurn frá kærendum um breytingu á deiliskipulagi Suður-Mjóddar vegna lóðar nr. 6 við Álfabakka sem fólst í því að heimilt yrði að reisa stafrænt tveggja hliða skilti á lóðinni. Á fundi skipulagsfulltrúa 27. júní s.á. var erindi kæranda um deiliskipulagsbreytingu synjað og á fundi byggingarfulltrúa 21. október s.á. var umsókn um byggingarleyfi synjað á grundvelli umsagnar skipulagsfulltrúa frá 6. október 2022 og svars vegna deiliskipulagsbreytingar, dags. 27. júní 2024.

Kærendur óskuðu á ný eftir breytingu á deiliskipulagi fyrir Suður-Mjódd með erindi, dags. 16. september 2024, þannig að tekið yrði fram í kafla deiliskipulagsins um auglýsingaskilti á lóð nr. 6 við Álfabakka að það sem þar kæmi fram ætti líka við um stafræn skilti. Sótt var um byggingarleyfi að nýju 15. október 2025 og með umsókninni var „erindislýsing“ þar sem bent var á að samþykkt Reykjavíkurborgar um skilti og gildand deiliskipulagi fyrir lóð Álfabakka 6 bæri ekki saman um stærð leyfilegs skiltis á lóðinni. Af þeim sökum ætti ákvæði deiliskipulags að gilda, en skilti það sem kærandi hefði sótt um leyfi fyrir rúmaðist innan skilmála deiliskipulags. Erindi kæranda um byggingarleyfi hefur ekki verið afgreitt.

Með bréfi, dags. 22. ágúst 2025, tilkynnti byggingarfulltrúi kærendum að borist hefði fjöldi ábendinga vegna stafræns skiltis sem staðsett væri við inn- og útkeyrslu á lóð nr. 6 við Álfabakka. Tekið væri fram í ábendingum að staðsetning skiltisins hindraði sýn vegfarenda og

gæti valdið slysaðættu. Í ljósi þess að byggingarleyfisumsókn vegna skiltisins hefði verið synjað af hálfu byggingarfulltrúa 22. október 2024 væri veittur 30 daga frestur frá dagsetningu bréfsins til að fjarlægja umrætt skilti. Yrðu kærendur ekki við kröfunni væri áformað að beita dagsektum kr. 150.000 fyrir hvern þann dag sem það kynni að dragast að ljúka verkinu. Var jafnframt gerð krafa um að slökkt yrði á skiltinu án tafar. Kærendur andmæltu fyrirmælum byggingarfulltrúa með bréfi, dags. 8. september s.á., og kröfðust þess ákvörðunin yrði afturkölluð og að byggingarfulltrúi léti af áformum um álagningu dagsekta. Byggingarfulltrúi svaraði kærendum með bréfi, dags. 24. s.m., þar sem fyrri ákvörðun um að fjarlægja skuli skiltið var ítrekuð og staðfest var ákvörðun um álagningu dagsekta kr. 150.000 frá og með 26. s.m.

Kærendur vísa til þess að með kærunni hafi þeir nýtt sér lögvarinn rétt sinn og heimild til að bera lögmati hinnar kærðu ákvörðunar undir úrskurðarnefndina. Ef réttaráhrifum verði ekki frestað blasi við að kæruheimildin verði þýðingarlaus. Um sé að ræða íþyngjandi ákvörðun sem beinist einungis að kærendum. Ákvörðunin hafi í för með sér mikinn tilkostnað, rask og verðmætasóun. Þá verði að líta til þess að umsókn um byggingarleyfi, dags. 15. október 2025, hafi enn ekki verið tekin til meðferðar.

Af hálfu Reykjavíkurborgar er kröfum kæranda um frestun réttaráhrifa hafnað þar sem ekkert hafi komið fram sem bendi til þess að veitt hafi verið leyfi fyrir umræddu skilti, né að ákvörðun um að fjarlægja skuli það sé háð annmörkum sem valdið gætu ógildingu.

Niðurstaða: Í 1. mgr. 5. gr. laga nr. 130/2011 um úrskurðarnefnd umhverfis- og auðlindamála er tekið fram að kæra til úrskurðarnefndarinnar fresti ekki réttaráhrifum kærðrar ákvörðunar en jafnframt er kærendum þar heimilað að krefjast stöðvunar framkvæmda til bráðabirgða séu þær hafnar eða yfirvofandi. Með sama hætti er kveðið á um það í 29. gr. stjórnsýslulaga nr. 37/1993 að kæra til æðra stjórnvalds fresti ekki réttaráhrifum ákvörðunar en þó sé heimilt að fresta réttaráhrifum hinnar kærðu ákvörðunar til bráðabirgða meðan málið er til meðferðar hjá kærustjórnvaldi þar sem ástæður mæli með því. Tilvitnuð lagaákvæði bera með sér að meginreglan sé sú að kæra til æðra stjórnvalds frestar ekki réttaráhrifum kærðrar ákvörðunar og eru heimildarákvæði fyrir frestun framkvæmda kærðrar ákvörðunar undantekning frá nefndri meginreglu sem skýra beri þröngt. Verða því að vera ríkar ástæður eða veigamikil rök fyrir ákvörðun um stöðvun framkvæmda.

Tekið er fram í athugasemdum með 5. gr. í frumvarpi því sem varð að lögum nr. 130/2011 að ákvæði greinarinnar byggist á almennum reglum stjórnsýsluréttar um réttaráhrif kærur og heimild úrskurðaraðila til að fresta réttaráhrifum ákvörðunar, sbr. 29. gr. stjórnsýslulaga. Í athugasemdum með þeirri grein í frumvarpi til stjórnsýslulaga er tiltekið að heimild til frestunar réttaráhrifa þyki nauðsynleg þar sem kæruheimild geti ella orðið þýðingarlaus. Þar kemur einnig fram að almennt mæli það á móti því að réttaráhrifum ákvörðunar sé frestað ef fleiri en einn aðili sé að máli og þeir eigi gagnstæðra hagsmuna að gæta. Það mæli hins vegar með því að fresta réttaráhrifum ákvörðunar ef aðili máls sé aðeins einn og ákvörðun er íþyngjandi fyrir hann, veldur honum t.d. tjóni. Þetta sjónarmið vegi sérstaklega þungt í þeim tilvikum þar sem erfitt yrði að ráða bót á tjóninu enda þótt ákvörðunin yrði síðar felld úr gildi af hinu æðra stjórnvaldi.

Í máli þessu er kærð sú ákvörðun skipulags- og byggingarfulltrúans í Reykjavík frá 24. september 2025 að leggja á dagsektir að fjárhæð kr. 150.000 fyrir hvern þann dag sem kærendur draga að verða við kröfu um að fjarlægja stafrænt auglýsingaskilti á lóð nr. 6 við Álfabakka. Kærendur hafa nýtt sér heimild til að bera lögmati hinnar kærðu ákvörðunar undir

úrskurðarnefndina, en um íþyngjandi ákvörðun er að ræða sem beinist einungis að kærendum. Eins og málsatvikum er háttað þykir rétt að fresta réttaráhrifum ákvörðunarinnar enda liggja ekki fyrir knýjandi ástæður sem gera það að verkum að varhugavert sé að bíða niðurstöðu úrskurðarnefndarinnar um ágreiningsefni máls þessa.

Úrskurðarorð:

Frestað er réttaráhrifum ákvörðunar skipulags- og byggingarfulltrúans í Reykjavík frá 24. september 2025, um beitningu dagsekta að fjárhæð 150.000 kr. frá og með 26. september 2025.

Arnór Snæbjörnsson (sign)